

Fiesta

statt

Siesta



grindet 1975

Fasnacht 2017


Blaggedde 2017



Motto:
«Mer spränge dr Raame»

Fiesta in dr Stadt
das isch in dr Stadt sicher glatt
drei Daag dieen mir Fiesta mache
wäärend dr Fiesta ganz vyyl lache
und no dr Fiesta findet dSiesta statt
no dr Fiesta isch e Siesta schampar glatt.

Und wider kaasch unsere FCB
an dr Spitze vo dr Tabälle gseh
souverän fieehrt är die Liiga aa
losst alli andere wyt hindedraa.
Wär doch dr FC Ziri no drbyy
denn kennt's emänd e weeneli spannender syy
aber die schlägge immer no ihri Wunde
uf dr Eehrerundi in dr CL unde.
Aber villicht styyge si das Joohr jo wider uff
und mische die Superleague wider e bizzli uff.
Mir Basler leen dr FC Ziri nit stooch im Schilf
und laische doo gärn Entwigglichshilf
drum seen mir si im Cup scho glyy
denn sinn ihri Chance grad wider verbyy.
Do kaa Ziiri nit mit dr grosse Kelle rieehre
und mir gseehn denn, wo das duet aanefieehre.



Fascht jeedi Wuche e neije Bricht
ain us dr Regieerig verliert sy Gsicht
und ai Skandal non em andere
duet dur dr Blätterwald durewandere.
Losch di mit em Auto haimschoffieere
oder an Flugplatz eskortieere.

Griegsch nöime Gäld, und dueschs nit deklarieere
kaa sich dFinanzkontrolle profilieere
si sueche und sueche und gänn nit uff
und degge jeede Missbruuch uff.
Und unseri liebi Basler Zyttig
isch uff so Bricht so richtig gyttig
si duet vvyll dieefer aabe boohre
verpasst dr Regierig rooti Oohre.
Deggt no ganz anderi Skandääleli uff
macht drmit dParteie au grad muff
do duet dBaZ mit ganz grosser Kelle rieehre
wo duet ächt das no aanefieehre.

E zwaite Turm solls gää am Rhyy
und das ganz schnäll – scho zimmlig glyy
no heecher – no braiter – mir findes nit glatt
was do duet gschee mit unserer Stadt.
Mir froogen is – wär hett do sSaage
es git doch rundumme so vvyll Klaage.

Die hänn kai Chance –
es bestimmt dä mit gnueg Gäld
es isch allewyyll sglyych uff deere Wält
und unsri Regieerig luegt zue und niggt
nit ebbe will Basel anderscht tiggt
nai – es sinn anderi, wo do dFäade zieehn
wo in und über dStadt verhandle dieen.
Geegen usse stooht dRegieerig für die Idee yy
und verdient nit grad so schlächt drbyy
drum geehn doch vvyll Lütt nimm go wäähle
wär will sich denn no mit so Waahle quäähle.

Sgoocht im glyyche Stil wyter –
swird mit dr grosse Kelle grieehrt
wär waiss, wo das no anefieehrt.



Unseri Stadt versufft im Drägg
sruumt nämmlig niemerds me
syy Drägg ewägg.

E verschnuuderets Nasduech,
e aagfrässe Weggli
e halbi Brootwurscht

und e Plastigseggli

e Büggse Bier und e Fläsche Wyy
das alles findsch grad am Bord vom Rhyy.


In dr Steine gsehts au nit besser us
deert lääbe si sowisoo alli voruss
goohsch dur dStadt, hersch glyy e Baizer mozze
will grad aine vor syy Düüre duet kozze.

E Stiggli wyter – kaschs vo wytem scho schmegge
schifft en andere grad an en Egge.

Denn an dr Heuwoog stoht ain an der Wand
mit ere Büggse Farb in dr Hand
är sprayt ganz friidlig vor sich aane
und wär putzt das wider – nundefaahne?

Bisch ändlig bim Dram, kunnt aine go z laufe
«Hesch mr e Stutz zum öbbis zässe kaufe».

Dehaim diene di denn dGedangge quääle
zBasel ischs gruusig – mr versuffe im Drägg
und niemerds macht sy Drägg ewägg
aber für neiji Quartier wird
mit dr grosse Kelle grieehrt
wär waiss, wo das no
aanefieehrt.



Was isch au mit unsrer Stadt passiert

Basel wird vo rot-grien regiert
vertribe wird so au dr Mittelstand
das isch doch aifach allerhand.

Die Meehbessere, die vom Bruederholz
die haige – so sait me – ihre Stolz
aber deene ischs egal, was dRegieerig duet tryybe
solang Multikulti unde in dr Stadt duet blyybe.

Statt sich weehre, zieehn vyyl Basler
in dNochberkantene

und findes deerte au sehr scheen.

Zrugg blyybe die, wo rot-grien wääle
me muess sich nimm mit andere quääle
si mache dGränze uff fir meeh Asylante
mit Kind und Keegel, Unggle und au Dante
si wärde Basler Birger, hänn in dr Stadt glyy sSaage
und dFraue derfe glyy au e Burka traage
und immerno wird mit dr grosse Kelle grieehrt
wär waiss, wo das no aanefieehrt





SCHINECHICOS



Sisch im Grund gnoo glyych, wär dwäähle duesch
mit wäm die näggscht Legislatur verbringe duesch

si verträtte am Aafang no ihri Partei
denn plezzlig kunnt e grosses Gschrei.

Will dPartei plözzlig realisieere
dass die, wo unseri Stadt regieere
numme ains im Sinn no hänn
und ihri aigne Inträsse verträtte wänn.

Es git au die, wo nit wänn verstoooh
weeles Departemänt si hänn übernöö
dr Wessels Hampe glaubt bis hütt no emänd
är syyg im Basler Velo Departemänt.

Vom Ängelbärger hesch au nit vyyl vernoo
mr froogen is als, isch dä ächt no do?

DEva Herzog blibt uf em Sässel hogge
si isch die ainzig, wo kaa frohlogge
si hietet sGäld wie dr hailig Gral
so gwünnt si zBasel jeedi Waahl.

Mir vermisse jetzz scho dr Morin Guy
är isch e danggbar Opfer gsi
wo är gstanden isch oder au gloffe
hett er allewyyl e Fettnäpfli droffe.

Jetzt duet sElisabeth Ackermäa
mit dr grosse Kelle rieehre
und iberlegt, wo das no kennt aanefieehre

Vierzig Joor hett dJoggeli-Halle
rundum allne seer guet gfalle
me hett si bruucht für Spiil und Sport
zBasel gits kai bessere Ort

«auf los geht's los» und «Wetten dass ...»

Musikantestaadel – und ganz krass
Sportler Ass und Schwizer Misse
wette mir doo inn nit misse.

Wiehnachts Tattoo und Apassionata
zwischen duure e Persona non grata
dHarlem Globetrotters mit ihre Balle
hänn mängge Lytt sau guet gfalle

Dr Basler Sportpryys wird deert vergää
au dä wurd e mängge sehr gärn nää.

DBanker-Punker – maagsch di bsinne?
hänn Megaerfolg ghaa in deere Halle inne.
Kennt dHalle schwätze – die kennt brichte
vo 40 Joor lang tolle Gschichte.

Jetzt wird si umbaut –
mit grosser Kelle dien si rieehre
wo duet ächt das no aanefieehre?



Vorspyys

«Sopa azteca»

Zuedaade: 1 Ziibele
2 Knoblauchzeeche
2 EL Olivenöl
1 kg Tomate
1 L Hiehnerbouillon
1 Chillischoote oder 1 TL Chillipulver
Tortilla Chips
1 Avocado, glaini Wirfeli
150 g Schoofkääs, glaini Wirfeli
150 g suure Raahm
Salz

Zueberaitig:

Ziibele und Knoblauch fyyn hagge und im haisse Öl aabröötle. Tomate grob hagge und in dPanne gää, ebbe 20 Minute kecherle loo.

dHiehnerbouillon drzuegää, mit Chilli und Salz abschmegge, 15 Minute wyterkecherle loo.

Die haiss Suppe in Däller fille und mit de Avocado- und Schoofkääswirfeli und emene Leffel suure Raahm servieere. Drzue gits Tortilla Chips.



Hauptgricht:

«Arrachera»

Zuedaade: 1 kg Flankesteak
½ EL Kimmipulver
Salz
Pfäffer
¼ Tasse Limettesaft

Marinaade: 2 EL Olivenöl
½ Tasse Tequila
2 EL ghaggte Knoobli
¼ Tasse Limettesaft

Zuedaade für dMarinaade guet vermische, sFlaisch 12 Stund in deere Marinaade zieehloo und denn uff e Grill leege. Nach em Grilliere mit em Limettesaft ystryryche.

Mit Ryys servieere.



Dessert

«Flan de Café»

Zuedaade: 155 g Zugger
1 EL Honig
1 Biggse zuggereti Kondänsmilch
180 ml Crème fraiche
2,5 dl Milch
1 Zimetstängel
1 EL Kaffliköör
2 EL Nescaffipulver
5 Eier
 $\frac{3}{4}$ EL Vanille-Extrakt flüssig

Zueberaitig:

Zugger und Honig in 0,6 dl Wasser bi mittlerer bis stargger Hitz ufflööse. Drnoo bi schwacher Tämpra-tuur ebbe 10 bis 15 Minute stohloo, bis dMasse e goldigbruuni Farb aagnoo hett. Drnoo die Masse in e grossi Schissle oder in ebbe 8 glaini Feermli fille.

Kondänsmilch, Crème fraiche und dMilch mit em Zimetstängel uffkoche. dPanne vom Härd nää und ebbe 10 Minute stohlooh. Zimetstängel uusenää, sNescaffipulver in e bitz haissem Wasser ufflööse und zämme mit em Kaffliköör drzue due.

Eier in ere Schissle guet verglopfe und die haissi Milch und dr Vanille-Extrakt nodisnoo unter dAier rieehre. Die Eier-Milch dur e Siib in die Schissle oder in dFeermli mit dr Honig-Zuggermasse fille.

E Kasserolle mit ebbe 2,5 cm Wasser fille, dSchissle oder dFeermli drystelle und im Oofe, wo uff 165 Grad vorghaizt worden isch, ebbe 60 bis 90 Minute (glaini Feermli 40 bis 60 Minute) gaare.

Dr fertig Pudding mit ere Folie abdegge und mindestens 6 Stund – no besser zwei Daag lang – in dKieehli stelle.

Mir dangge:

Drugg:



Gstaltig: Anita

Inapa Schweiz AG fir das tolle Babbyyr

Susy und Esthy für die fyne Pointe

em Larvemacher



fir d Larve und d Zeichnige

de Schnidere Angela und Daniela,
de Haut-Couture vo Basel

fir dStreet Art:
Cédric Martinelli
martinelli78@gmx.ch



www.schineblooser-waggis.ch





zBasel an mym Rhy



Fasnacht an mym Rhy
Und mir sinn derby
Joor fir Joor am Waagebau
Zeedel Goschdyym sinn e Schau
Basler Fasnacht und mir sinn derby
Basler Fasnacht und mir sinn derby



Schmeggsch dä bsunder Duft
Das isch Fasnachts Luft
Ziibelewaije und Mimoose
Orangsche, Röppli und au Roose
Das isch Basel – das isch Basler Luft
Das isch Fasnacht – das isch Fasnachts Duft



Au mir stehen wiider yy
Sinn jeedes Joor drbyy
Mir Schineblooser – mergg dir dä Naame
Spränge allewyyl dr Raame
An dr Fasnacht, zBasel an myym Ryy
Basler Fasnacht und mir sinn drbyy